

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Un wikènt nobo riba nos Plenchi di skol. Yen di positivismo i yen di vibrashon. Danki pa bo kompania un biaha mas. Nos ta konta e dianan pa nos por topa ku bo riba nos plenchi. Bo a realisá ku ta e último wikènt di oktober esaki ta? Ba konta bon, ku falta 8 siman mas o menos pa aña kaba? Ta asina tempu ta bula ku ala di manteka. Manera rakèt kasi. Pero nos tei, nos tei pa keha ora dianan no ta pasa lihé pa nos hasi 18 aña pa nos stür outo pa kaba. Pa nos bira independiente. Nos tei ora ku nos ta konta dianan pa bai ku fakansi. Nos tei tambe ora nos ta kansá pero ta manera e dianan ta kana slou pa nos tuma fakansi. Nos tei tambe ora ta hasi kalor i nos ta pará den rei pa warda nos burt pa drenta na e entiero di e persona konosí den komunidad. Nos tei i esei ta konta. Nos tin bida ku salú i nos ta purba biba konsiente. Konsiente di balor di kada dia. Konsiente ku tur loke bo por hasi awe, no lague pa mañan. Pero konsiente tambe ku de bes en kuando bo mester karga bo bateria dor di tuma un sosiego. Kontentu ku bo tei ku nos. Ban subi nos plenchi pa nos interkambia.

Not'è riba bòrchi

Awe nos ke trese pa boso un bista kon nos a selebrá dia di dosente dia 5 di oktober último. E aña aki nos tema pa konferensha tabata wellness. Nos a sigui riba e tema aki dia di dosente. Un feria salú nos a organisá ku diferente stènt ku produkto i informashon salú.

Tabatin informashon di SVB, di hartstichting. Produktonan salu di EM, nan kraaltjes di serámika pa purifiká awa a bai manera pan kayente. Stul pa masashi. Awa salú ku sabor di st. Antonius College. Sokudi, Dinah Veeris, Max & Bee. Integra Natural, Life Body Care, Sprinchi life. Tabatin benta di kuminda salú. Sprinchi life a traha un bolo di Zucchini ku a kaba den tempo rèkòrt. Masha dushi mes. Rendel Rosalia huntu ku Mimoushka Lieuw (Arboconsult) a duna un presentashon di musika i baile masha bunita. Tur dia lanta mainta i tuma 1 minut pa bo gradisí un persona den bo bida ku a yudabu progresá. Un dosente o edukador. Esunnan ku no ta dunabu informashon i lès so pero a dunabu sabiduria. Hasie tur dia pa asina bo kuminsá bo dia ku gratitut pa tur loke a pasa i habri pa risibí tur loke ta bai bin ku gratitut.







Den agènda

Fakansi di skol:

21 desèmber te ku 3 yanuari.

Selebrashon

Selebrashon hubilarionan di RK i brindis di aña nobo 11 di yanuari

Mi ta konta

Hende eksitoso

Hende eksitoso tin dos kos riba nan lep, sonrisa i silensio. Un sonrisa por resolvé un problema, silensio por evitá problema. Un meskla di suku ku salu no ta stroba e vruminga pa piki e granito di suku so bai ku ne. Skohe e persona adekuá den bo bida pa asina bo tin un bida mihó i dushi. Si bo no logra un meta ku bo tin, kambia bo manera di traha, no kambia bo Dios. Korda e palu ta kambia blachi i no su rais. Nunka lo bo no yega bo destino, si kada bes bo para i tira piedra na tur kacho ku ta blaf. Esnan ku no gustabu ta mirabu kana riba awa i lo komentá, ku esaki ta paso bo no por landa. Maske bo baila riba awa, bo enemigunan lo bisa ku ta provoká problema. Pone komo meta, biba un bida trankil, biba bo mes bida i sorú pa bo mes moketa yena bo boka.

Kòrda, no bringa ku un porko nunka. Paso na final boso tur dos lo keda stinki shushi, e porko gusta shushi i lo sinti den su elemènt. Usa bo tempu bon i skohé bo batayanan konsiente. Bataya pa logra meta positivo i hasie ku personanan ku tambe tin e mesun meta.

Mucha djispou

Mama: "Quinton bo mester kome berdura mi yu. Henter ora bo ke bolo so."

Quinton: "Mi ta kome bolo, bolo ta trahá di lechi. Lechi ta bin di baka, baka ta kome yerba. Kier men si mi kome bolo mi ta kome yerba."

Mama: "Ai no mi yu, bo ta sofokami."